

CACA CHE NDONDA TAH IHYAN CHE RENTE YE DEVĀCŌ HEBREO

Dechuh Dendiohs Daya ye, cah ye, checadino ihyan iyehmse ndudo yahn ye

¹ Ro menan me ne, ama ndeh yune man, ama nuhn ino Dendiohs man, cah cuande ye ndudo yahn ye ihyan profeta cava che cuahndudo ye, cahnevan ihyan ndico yuhn vo. ² Man adiva ne, dechuh ye Daya ye, ndahco ye nducuahn dehtenduh tah ye. A nduco ihyan min dendah ye iyehmse. Dechuh ye ihyan, te nduco ihyan min te ye ndudo yahn ye, checadino vo. ³ Nduhca yahn che rendihco dave yahn ne, tihca rihco ro ihyan min vederihquentiyon yahn Chida ye. Ihyan min nduco Chida ye ne, dama no ye. Ihyan min ne, numacuahn vederihquentiyon yahn ye, redin ye cudado iyehmse. A ihyan min che nedihve ye yahn nunde yuhn vo, ndaco vo vederenchahco. Tuhme chihnde ye vahchetero lado tah cuaco Dendiohs.

Daya Dendiohs ne, tahque ndinan ye che co nducoyaca ángel

⁴ Daya Dendiohs ne, tahque ndinan ye che co nducoyaca ángel, te tahque yudo vederihquentiyon ndahco Dendiohs tah ye. ⁵ Tihca, te Dendiohs ne, nde menahn hua rahn ye ri ye nde ama ángel:

Di che Dayá.

Man ro cuh chihco ró che Dayá di.

Nde hua rahn ye yahn nde ama ángel:

Dayá ihyan.

U che Chida ye.

⁶ Ate cuahn che dechuh ye Daya ye che menan iyehnse ne, rahn ye:

Nchuhn, nducoyaca ángel yáhn, cuendeva ne yavenan ye.

⁷ Me yahn ángel ne, tuhca rahn ye:

Dín che co nchuhn nduhca vaco man, ruchiyahn man.

⁸ Ate yahn Daya ye ne, rahn ye:

Di Dendiohs, vederihquentiyon yehn ne, hua nda ro che cuihno.

Numa cuaco rihquentiyen.

⁹ Renan ine nducuahn che ndah, ne racondah vedame nducuahn che chihnga.

Chemin che u Dendiohs yehn, redín che tahque ri yene che co nducoyaca combiero yehn.

¹⁰ Namin rahn ye:

Di Dihve ihyan iyehnse, nde ro menan me ne, dendah iyehnse man, nan ro man.

¹¹ Chemin ne, va che cuihno, ate di ne, conen cuahn dama. Nducuahn dehtenduh chemin chan ne, va che co ndico nduhca che ri ndico tino.

¹² Din anduhca che nehn nduco dehtenduh chemin chan, cahnevi anduhneca ndete che ama tino, ne ndacoron.

Ate man di, hua nda ro che ndacoron, nde hua nda ro che coh.

¹³ Nde menahn hua rahn Dendiohs ri ye nde ama ángel: Cuihnde lado tah cuaco numanahn che ndahco ndiyá ihyan che hua ri rendihche ye di, cava che nevah-necun ye di.

¹⁴ Nducoyaca ángel ne, vaco che redin ye ntiyon yahn Dendiohs. Redechuh ye ihyan cava che conan ye ihyan iyehnse che quenán cuma che ndevahn ye.

2

Hua ndahca che cahcoman vo Ndudo yahn Dendiohs

¹ Nducote tahque yudo vederihquentiyon yahn Dihvo vo Jesucristo che co ángel ne, chemin che quenán cuma che cuahtenun ino vo ndudo che a chihnevan vo çava che hua çahcomañ vo. ² Tihça, te nducote a chinahn ndudo yahn Dendiohs che dechuh ye nduco ángel a rahn me, ne ihyán che chahcotahn ye yahn ndudo min, chendihco ye nunde, a chi ye castigo che redin yahn che co ye ne, ³ namin uvo ne, hua co ndevahn vo ndete che hua tumacah vo yahn ndudo ndah yahn vederenchahco che rete Dendiohs uvo. Ndudo min ne, a Dihvo vo Jesucristo menañ vih cahndudo ye, ne nuhn che chihnevan nuhn ndudo min ne, tumacadino nuhn che cuaco. ⁴ Avane ne, ama ndeh nan vederihno din Dendiohs, chihco ro ye che cuaco, nde din ye che chenán cuma vo vederihquentiyon yahn Vaco Ndah yahn ye tunoca che nahn man ye.

Dihvo vo Jesucristo ne, nda ye muhn iyehñse cuh, ndaconda ye ihyán

⁵ Vederihquentiyon cuh che rendañconun yan che va che cuhnde ne, hua chihco Dendiohs tah ángel. ⁶ Hua, te ama cuan nan Ndudo yahn ye dirun ama ihyán tuhça: Dendiohs, nde hua rignonun chihve ihyán iyehñse çava che necahco ne ihyán.

Nde hua rignonun chihve ye çava che din ne cudado ihyán.

⁷ Numanahn min ne, tahque doh vederihquentiyon çah ne ihyán che co ángel.

Vañ nducuahn dehtenduh che dendah ne ne, tahque çah ne vededevano ihyán.

Çah ne vederihquentiyon ihyán çava che çahcantiyon ye nducuahn dehtenduh che dendah ne.

⁸ Ndahco ne nducuahn dehtenduh tah ye.

Nducote ndahco Dendiohs nducuahn dehtenduh tah ihyán ne, nducuahn va che çahcantiyon ye. Man ro cuh ne, ametah nevahñecun nducuahn dehtenduh ihyán.

⁹ Ate Dihvo vo Jesucristo che cuāco ne, nducote chih ye ne, renevahneccun nducuahn dehtenduh ihyan, rendeva yavenān ye. Numacuahn vedeyahino cahneccun Dendiohs che chih ye cava nducoyāca ihyan iyehñse.

¹⁰ Nducuahn dehtenduh ne, yahn Dendiohs. Man ye dendah ye, ne nahn ndeva ye nducoyāca daya ye vahchetero. Chemin che quenān cuma che cañ yune ye che chuhrihn Dihvo vo Jesucristo, dinahn ye nducuahn, ndedevahn ye ihyan yahn ye. ¹¹ Ihyan che rendevahn ye man, ihyan min che rendedevahn ye ihyan man ne, daya Dendiohs nducoyāca ye. Chemin che Dihvo vo Jesucristo, ihyan min che Daya Dendiohs ne, hua ri cuihnān ye che redin dihno ye ihyan, ¹² nduhcā che a ndirun nān Ndudo yahn Dendiohs tuhca:

Nté yahn ne nduco dihnó.

Caťa himno, ndevá yavenān ne vān nducoyāca ihyan yahn ne.

¹³ Namin ndirun:

U ne, richahtinó Dendiohs.

Namin ndirun:

Muhn quenún nduco dayá che te Dendiohs u.

¹⁴ Nducoyāca ihyan che dihno ye vih ne, dama ndata yahn ye. Chemin che Dihvo vo Jesucristo ne, ndo ye nduhcā ihyan iyehñse cava che chi chih ye, ndahco ndiya ye chundah, sahn min che redin se che rinda ihyan, ¹⁵ ne ndedevahn ye nducoyāca ihyan che hua va man chedave yahn ye cuahn dama, vah ye vederih. ¹⁶ A devano vo te Dihvo vo Jesucristo ne, nda ye cava che ndedevahn ye ihyan che ndata yahn Abraham, ndiyu cava che ndedevahn ye ángel. ¹⁷ Chemin che quenān cuma che ndo ye dama nduhcā ihyan iyehñse, tumacadino man ye nducuahn vederihn cava che tahque conan cuma ye vedevahino nduco vo, ne cochahtino vo ihyan. Redin ye cudado uvo, rahn nan ye uvo nān Dendiohs, nde

chihco mendahn ye ihyan, chih ye cava che nchahco ye nunde yuhn vo. ¹⁸ Nducote chuhrihn man ye, tumarande chundah ihyan ne, tahque nun rendedevahn ye ihyan che retumarande se ihyan.

3

Vederihquentiyon che quenan cuma Dihvo vo Jesucristo ne, tahque yudo che co vederihquentiyon che quenan cuma Moisés

¹ Dihno che a tendahnun Dendiohs nchuhn, nducote a nedin yahn ye nchuhn ne, cuiquendi ne yune yahn Dihvo vo Jesucristo, ihyan min che dechuh ye ihyan cava che din ye cudado uvo, tihyon yune ye uvo che cotahno vo ihyan. ² Nduhca che dinahn Moisés yahn Dendiohs van nducoyaca ihyan yahn ye ne, tihca dinahn Dihvo vo Jesucristo, ihyan min che ndahco Dendiohs vederihquentiyon tah ye. ³ Dihvo vo Jesucristo ne, redin yahn che tahque rendeva vo yavenan ye che co Moisés. Tihca, te ihyan che rihno ye ama vah ne, ihyan min che ndeva vo yavenan ye, ndiyu vah me. ⁴ Queri ama vah ne, va ihyan che dendah ye. Namin nducuah che va iyehne ne, a Dendiohs che dendah ye. ⁵ Cuaco te Moisés ne, din ye ntiyon yahn Dendiohs, dinahn ye van nducoyaca ihyan yahn ye. Ntiyon che quenan cuma ye ne, che cuahndudo ye ndudo yahn Dendiohs tunoca che rechah ye ihyan. ⁶ Namin Dihvo vo Jesucristo ne, dinahn ye, ate nde tahque yudo vederihquentiyon quenan cuma ye, te nducote ihyan min che Daya Dendiohs ne, ndinan ye van nducoyaca ihyan yahn ye. Uvo ne, a ihyan yahn Dendiohs uvo, ndete che quendi vo numacuahn vedeyeno cohahtino vo ihyan nde nda ro che ndeva ye uvo.

Ihyan che cuahtenan ye nan Dendiohs

⁷ Nducote tihçā ne, ndahçā che dinahn vo ndudo che, numacuahn vederihquentiyon yahn Vaco Ndah yahn Dendiohs, a ndirun tuhçā:

Mān che cahnevan nchuhn ndudo yáhn,

⁸ hua din cheche ne chedave yahn ne nduhçā che din ihyan ndico yahn ne che chahcotāhn ye yáhn, ducherino ye u cuahn che chahtechica ye yāhn nān che metah duhva.

⁹ Ihyan ndico yahn nchuhn ne, hua chitahno ye u, andahre ndihchero ye vederihno che dín nduco ye chete o raco nduyo.

¹⁰ Chemin che chi tǎn nduco ye, ne ndedecadinó: “Ihyan sih ne, hua richahtino ye u numacuahn chedave yahn ye, nde hua redinahn ye che rihquentiyón.”

¹¹ Chemin che chi tǎn nduco ye, ne numacuahn vedeyudo chihco ðama inó che hua ndā ro che ndevá ihyan, cuahtenan ye nducó.

¹² Dihnó, cuihco nducoyāca nchuhn cudādo. Hua din cheche ne chedave yahn ne, çahcomān ne che ritahno ne Dendiohs, ihyan min che va ye vahchetero. ¹³ Tahque ndah ne, coyāhve āma tāmā ne vih ro ro, numanahn che chenān ne iyehñse, çāva che nde āma ne hua cahñcheh mān ne nchuhn, din cheche ne chedave yahn ne, cuahtendihco ne nunde. ¹⁴ Tihçā, te ndā ro che chi Dihvo vo Jesucristo ne, ndeva ye uvo ndete che quendi vo numa ino vo cochahtino vo ihyan, nduhçā che richahtino vo ihyan nde ro che canān chitahno vo ihyan.

¹⁵ Nahn che çahcovān vo nduhçā che yāhve Dendiohs uvo tuhçā:

Mān che cahnevan nchuhn ndudo yáhn, hua din cheche ne chedave yahn ne nduhçā che din ihyan ndico yahn ne che chahcotāhn ye yáhn.

¹⁶ Nducoyaca ihyan che ndetendah Moisés nación yahn Egipto ne, a ihyan chahn che chihnevan ye ndudo yahn Dendiohs, ne chahcotahn ye. ¹⁷ Ihyan che chahtendihco ye nunde, ne chih ye yahn nan che metah duhva ne, a ihyan chahn che chi tan Dendiohs nduco ye. ¹⁸ Ihyan che hua dinahn ye yahn Dendiohs ne, a ihyan chahn che, numacuahn vedeyudo, chihco dama ino Dendiohs che hua nda ro che ndeva ye ihyan, cuahtenan ye nduco ye. ¹⁹ A devano vo te hua chi tuno ihyan chahn nan Dendiohs, yahn che hua chitahno ye ihyan.

4

¹ Chemin che numanahn che rete ca Dendiohs ndudo yahn ye che ndeva ye uvo ne, nahn che cahco vo cudado, denan vate ama o vo che hua tuno vo nan ye. ² Cah Dendiohs ndudo ndah yahn ye ihyan ndico chahn, ne namin te ye uvo. Ate ihyan chahn ne, nde hua chichihve che chihnevan ye, yahn che hua chitahno ye. ³ A uvo che chitahno vo che ndeva Dendiohs uvo, cuahtenan vo nduco ye, te rahn ye yahn ihyan chahn tuhca:

Chemin che chi tan nduco ihyan sih, ne numacuahn vedeyudo chihco dama ino che hua nda ro che ndeva ihyan, cuahtenan ye nduco.

Cuahn che chihno ntiyon yahn Dendiohs che dendah ye iyehense ne, a va yan ye che ndeva ye ihyan cava che cuahtenan ye nduco ye. ⁴ Cuaco chemin, te ama cuan nan Ndudo yahn ye ndirun yahn ro sabado tuhca:

Ro sabado ne, nducote a nihno ntiyon yahn Dendiohs che dendah ye iyehense ne, chihnde tuhno ye.

⁵ Namin tama cuan nan Ndudo yahn ye ndirun tuhca:

Hua nda ro che ndeva ihyan sih, cuahtenan ye nduco.

⁶ Nducote tihca ne, a ndero ndi che a va yan Dendiohs che ndeva ye tama te o ihyan, cuahtenan ye nduco ye. Ihyan

chahn che chihnevan ye ndudo ndah yahn Dendiohs menan ne, hua tuno ye nan ye yahn che chahcotahn ye. ⁷Chemin che chihno ama ndeh nduyo ne, ndaconan yahve Dendiohs ihyan tama yune. Yahn chemin ne, a dirun. Din ye che dirun David tuhca:

Man che cahnevan nchuhn ndudo yahn Dendiohs ne, hua din cheche ne chedave yahn ne.

⁸Nan che ndeva Dendiohs ihyan, cuahtenan ye nduco vih ne, ndiyu yahn nan che nda Josué nduco ihyan ndico chahn, te ndete che a min ne, ametah ndaconan rahn Dendiohs che ndeva ye ihyan. ⁹Devano vo te coman va che ndeva Dendiohs ihyan yahn ye, ¹⁰te ihyan che ndeva ye ne, cuahte tuhno ye nduhca che chihnde tuhno man ye ro che chihno ntiyon yahn ye che dendah ye iyehkse. ¹¹Chemin che nahn che din nun ino vo cava che ndeva Dendiohs uvo. Condi dama co ama o vo nduco ihyan ndico chahn che hua chitahno ye.

¹²Tihca, te Ndudo yahn Dendiohs ne, yudo vederi-hquentiyon yahn, redin che renda ihyan nan ye. Tahque nun ca renda chete chedave yahn ihyan che co ama espada che o can yahn, ne rihco ro vederendedecadino yahn ye.

¹³A Dendiohs che techecade ye yahn ihyan. A ihyan min che dendah ye nducuahn, ne metah nde ama nan dehtenduh che co conun ndeh nan ye. A nan ye va nducuahn.

Dihvo vo Jesucristo ne, nda cuande ye ihyan yahn ye

¹⁴A Dihvo vo Jesucristo Daya Dendiohs, che nda cuande ye uvo. Ihyan min ne, conahn ye vahchetero, rahn nan ye uvo nan Dendiohs. Chemin che nahn che quendi vo numa ino vo cotahno vo ihyan. ¹⁵Dihvo vo Jesucristo ne, tumarande chundah ihyan nan nducuahn, ate hua quendihco ye nde ama nunde. Chemin che, nducote man ye chuhrihn ye ne, a devano ye nduhca che rechuhrihn

vo, ne renan vahino ye uvo. ¹⁶ Man ne, nahn che dehve rahco vo, covah vo nan Dendiohs yuhn vo, ihyan min che yahino ye uvo, cava che numacuahn vedeyahino man, vedevahino man, conan ye uvo cuahn che yah rahno vo.

5

¹ Queri ama chidocuyan ndinan ne, retendahnun Dendiohs ihyan van ihyan iyehnse cava che cahma nan ye ihyan nan Dendiohs man, rihno ye ite che co te vedino cava nunde yahn ye man. ² Chidocuyan chahn ne, nducote ihyan nunde ye nduhca ihyan chenahn ne, chemin che riquendah ye vedechahtino cava ihyan tundo man, ihyan che redinda ye man. ³ Va che cahno ye ite che co te vedino cava nunde yahn ihyan yan, ne nducote namin ihyan nunde ye ne, quenan cuma che cahno ye ite che co te vedino cava nunde yahn man ye.

⁴ Nde ama ihyan ne, hua co tendahnun man ye vederihquentiyon min, conan cuma ye. Atenan man Dendiohs retendahnun ye ihyan che rechah ye vederihquentiyon min nduhca che cah ye Aaron. ⁵ Atihnocah Dihvo vo Jesucristo. Hua tendahnun man ye vederihquentiyon min, quenan cuma ye. Tahque ndah ne, a man Dendiohs tendahnun ye ihyan. Rahn ye ri ye ihyan:

Di che Dayá.

Man ro cuh chihco ró che Dayá di.

⁶ Namin rahn ye ri ye ihyan nduhca che ndirun nan Ndudo yahn ye tuhca:

A tendahnun di che co chidocuyan ndinan, cuhnde tah vederihquentiyon nduhca che quenan cuma Melquisedec,

ne hua nda ro che cuhno vederihquentiyon yehn.

⁷ Cuahn che quechica Dihvo vo Jesucristo muhn iyehnse ne, covah ye numa ino ye, nde chaco ye, ne Dendiohs,

ihyan min che va vederihquentiyon yahn ye che ndede-
vahn ye ihyan t̄ah vederih ne, chihcovan ye yahn che
ndeva Dihvo vo yavenan ye. ⁸ Andahre Daya Dendiohs
ihyan ne, ate chi nino ye dinahn ye van nducuahn che
chuhrihn ye. ⁹ Cuahn che chenah dinahn ye nducuahn ne,
chihco mendahn ye ihyan, chih ye cava che, nducoyaca
ihyan che cotahno ye ihyan ne, ndevahn ye, ne cuahtenan
ye vahchetero numacuahn ro. ¹⁰ Tihca, te a tendahn-
nun Dendiohs ihyan che co ye chidocuyan ndinan, cuh-
nde t̄ah ye vederihquentiyon nduhca che quenah cuma
Melquisedec.

Cahnda che cahcoman vo che ritahno vo Dihvo vo Jesucristo

¹¹ Ama va ca dehtenduh che nahn te cuandé nchuhn,
ate ama vahche che din che conahn ne yahn che hua rihco
ne che conahn ne. ¹²⁻¹³ Ametah ro che ritahno nchuhn
Dihvo vo Jesucristo, ate ndotenan che man ne cacuahn ne
ne, rendotenan ne che ndaconan cacuahn ihyan nchuhn
dehtenduh che nde hua vahche nan vederihquentiyon
yahn Dendiohs. Nduhca decuah yuno che hua ri che
chah dehtenduh, te deman leche rih ne, tihchan nchuhn.
Hua renahn ne vederihquentiyon yahn Dendiohs, nde
hua retumacadino ne taca che cuahtechica ne runecade.
¹⁴ Ihyan che ndah renahn ye vederihquentiyon yahn
Dendiohs ne, a ihyan chahn che devano tendahnun ye
dehtenduh. Riquendi ye cha che ndah, ne rihcoman ye
cha che hua ndah.

6

¹ Nducote tihca ne, quendi vo cuahn ndah vo veder-
ihquentiyon yahn Dendiohs cava che conahn ndah vo.
Dehtenduh che chahn vo cuahn che cade chitahno vo
Dihvo vo Jesucristo ne, ndiyu dechemin dechemin cuahn
vo cuahn dama, te ama va ca vederihquentiyon yahn ye
che nahn che cuahn vo. Hua deman yahn nduhca che

rento ino ihyan nunde yahn ye che redin che rinda ye man, nduhca che ritahno ihyan Dendiohs man, ² nduhca che redenune ihyan man, nduhca che renahn tah ye ihyan, revah ye cava ye man, nduhca che ntuche tenahn man, nduhca che techecade Dendiohs yahn ihyan nunde, din ye castigo ihyan cuahn dama man. Hua deman dehtenduh chemin chan che va che cuahn vo, ³ te ama va ca vederihquentiyon yahn Dendiohs che cacuahn nchuhn ndete che cuahnecun ye.

⁴⁻⁶ Ihyan che a chenahn ye vederihquentiyon yahn Dendiohs man, ndudo ndah yahn ye man ne, tumacadino ye vedeyahino yahn ye man, vederihquentiyon yahn Vaco Ndah yahn ye man, vederihquentiyon che cuahtenan ihyan vahchetero man. Ndete che cuacondah vedame ye Dendiohs ne, ama yune denda ye, te anduhneca che ndaconan nahn yah ye Dihvo vo Jesucristo, din duche yahn ye ihyan nan nducoyaca ihyan. ⁷ Nduhca ama yahn nan che ndahca ran co ne, ndete che ndah ri chendata yahn ihyan ne, nedin yahn Dendiohs yahn min. ⁸ Ate ndete che deman chano yan ri ne, din dine ye, nde cahco vih ye cava che cuco.

Richahtino vo Dihvo vo Jesucristo cuahn dama

⁹ Dihno che yahino nchuhn, a dirun yahn ne nduhca che rahno ihyan che racondah vedame ye Dendiohs, ate a devano cuaco che a ndedevahn ye nchuhn, redin ye che runecade vatechica ne. ¹⁰ Dendiohs ne, ndah ye, ne ra cuande ye nduhca che din yahino ne ihyan yahn ye, chinan ne ihyan, nde rinan ca ne ihyan. ¹¹ Nahn che quendi nchuhn numa ino ne nduhca che a cochi ne, nde nda ro che chenah ino vo cuahn che ndeva Dendiohs nchuhn. ¹² Hua nahn che din dahnde nchuhn. Tahque ndah ne ne, cuiquendi ne yune yahn ihyan che chitahno

ye Dendiohs, ndichahtino ye che ndedevahn ye ihyan nduhc̄a che a nec̄ah ye ndudo yahn ye.

¹³ Cuahn che c̄ah Dendiohs ndudo yahn ye Abraham ne, c̄ah ye numacuahn vederihquentiyon yahn m̄an ye, te ametah t̄ama ca ihyan che tahque yudo vederihquentiyon yahn ye che co m̄an ye. ¹⁴ R̄ahn ye ri ye Abraham: “Cūaco r̄ahn rí di che āma dín che ndah ndoque, āma dín che co ȳahn nd̄ata yehn.” ¹⁵ Abraham ne, quenan rino ye numacuahn vedechahtino nde chinahn ndudo che c̄ah Dendiohs ihyan. ¹⁶ Ihyan iyehnse ne, cuahn che c̄ah ye ndudo yahn ye ne, rend̄ahconun ȳan ye Dendiohs, te ihyan min che tahque yudo vederihquentiyon yahn ye. Cuahn che tihc̄a c̄ah ye ndudo yahn ye ne, nde n̄an che c̄ahma ye, metah. ¹⁷ Namin Dendiohs, cuahn che c̄ah ye ndudo yahn ye Abraham ne, c̄ah ye numacuahn vederihquentiyon yahn m̄an ye, chihco ro ye c̄ava ihyan yahn ye che dinahn ye. ¹⁸ Tihc̄a c̄ah Dendiohs ndudo yahn ye numacuahn vedeyudo, ne co cochahtino vo ihyan, te redinahn ye ndudo yahn ye. Nducoȳaco vo che a nd̄ahco vo chedave yuhn vo t̄ah ye che ndedevahn ye uvo ne, hua dehve r̄ahco vo, te ndedevahn ye uvo nduhc̄a che a nec̄ah ye ndudo yahn ye. ¹⁹⁻²⁰ Quenan cuma che ndevahn chedave yuhn vo, ametah che ndedecadino vo. A chitahno vo Dihvo vo Jesucristo, ihyan min che va ye vahchetero, r̄ahn nan ye uvo n̄an Dendiohs c̄ava che co cond̄a vo min. Ihyan min ne, anduhnec̄a āma chidocuyan ndin̄an che va t̄ah ye vederihquentiyon nduhc̄a che quenan cuma Melquisedec che hua nd̄a ro che cuihno.

7

Va t̄ah Dihvo vo Jesucristo vederihquentiyon nduhc̄a che quenan cuma Melquisedec

¹ Melquisedec ne, rey yahn yān Salem, namin chi ye āma chidocuyān ndinān yahn Dendiohs, ihyan min che āma yudo vederihquentiyon yahn ye. Cuahn che ndaconan Abraham che chahn ye, cuhn ye nduco ino cun rey chahn, decuihno ye ihyan ne, chahn Melquisedec, chendi yune ye ihyan, ne chica ye che conan Dendiohs ihyan. ² Me Abraham ne, ndāhco ye neve dehtenduh che ndāca ye vān cānda me tāh ihyan min. Nān che ndiche dehtenduh ne, cāh ye āma ihyan. Che duche rey min, Melquisedec ne, tuhca conahn: “Rey ndah.” Namin dihn va nān che chihquentiyon ye, te yān yahn ye, Salem ne, tuhca conahn: “Yān nān che dihn va.” ³ Ihyan min ne, anduhneca ndete che co mān ye, te hua duh devano duh che chaco ye mān, duh che chida ye mān, nde hua duh devano ti chica ndāta yahn ye. Hua duh devano ticuahn chihndeyān ye mān, ticuahn chih ye mān, ndete che chihno vederihquentiyon yahn ye mān. Atihnoca Dihvo vo Jesucristo, Daya Dendiohs, te ndi ye anduhneca chidocuyān ndinān, ne hua cuihno vederihquentiyon yahn ye.

⁴ A ndero ndi te āma yudo vederihquentiyon quenān cuma Melquisedec, te nde ihyan ndico yuhn vo Abraham nevahnecon ye ihyan, ne ndeh nān dehtenduh che chihnevi ye yahn rey chahn, ndāhco ye tāh ye. ⁵ Nduhca che rihquentiyon ley che dirun Moisés ne, va che cāh ihyan nación yahn Israel āma dehtenduh nān che ndiche queri āma nān dehtenduh yahn ye che va, ndonda tāh chidocuyān che ndāta yahn Leví. Tihca va che din ye, te ndāta yahn Abraham ihyan nduco vih. ⁶ Ate Melquisedec ne, andahre hua ndāta yahn Leví ihyan ne, ndonda tāh ye dehtenduh che cāh Abraham, ihyan min che cāh Dendiohs ndudo yahn ye ihyan. A Melquisedec che chica ye che conan Dendiohs Abraham, ⁷ ne a devano vo te ihyan

che rica ye Dendiohs cava ihyan chenahn ne, tahque yudo vederihquentiyon quenán cuma ye. ⁸ A ndero ndi che tahque yudo vederihquentiyon che quenán cuma Melquisedec che co vederihquentiyon che chahtenan cuma chidocuyan che ndata yahn Leví. Ihyan chahn ne, chihno chih ye, ate Melquisedec ne, a ndirun yahn ye nan Ndudo yahn Dendiohs anduhneca ndete che va ca ye. ⁹⁻¹⁰ Leví nduco nducoyaca chidocuyan che ndata yahn ye ne, anduhneca ndete che nduco ye Abraham, ndeva ye yavenan Melquisedec, te andahre ametah ye ro min, ate Abraham che chihco ndata ye ihyan.

¹¹ Chidocuyan che ndata yahn Leví, che namin ndata yahn Aarón ne, ihyan chahn che chihnde tah ye ley che dirun Moisés, chicuahn ye ihyan nación yahn Israel. Ate nducote hua ndevahn ihyan nduco vederihquentiyon che chahtenan cuma chidocuyan che ndata yahn Leví ne, quenán cuma che dechuh Dendiohs Dihvo vo Jesucristo, nuhnde tah ye vederihquentiyon nduhca che quenán cuma Melquisedec. ¹² Che ndacorun Dendiohs vederihquentiyon yahn chidocuyan ne, nde ley yahn ye va che ndahco cade ye. ¹³ Tihca, te Dihvo vo Jesucristo ne, ndiyu ndata yahn chidocuyan ihyan. ¹⁴ A devano cuaco vo te nan ndata yahn Judá cochi ndata yahn ye. Namin a devano vo nduhca che chihquentiyon Moisés che atenan nan ndata yahn Leví quendah chidocuyan.

¹⁵ Nducote nuhnde tah Dihvo vo Jesucristo vederihquentiyon nduhca che quenán cuma Melquisedec ne, a ndero ndi che a ndahco cade Dendiohs ley che dirun Moisés, ¹⁶ te nuhnde tah ye vederihquentiyon min, ndiyu yahn che ndata yahn chidocuyan ihyan, ate yahn che quenán cuma ye vederihquentiyon che hua nda ro che cuihno. ¹⁷ Tihca, te a yahn ihyan min che ndirun nan Ndudo yahn Dendiohs tuhca:

A tendahnún di che co chidocuyán ndinán, cuhnde tah vederihquentiyon nduhcá che quenán cuma Melquisedec,

ne hua ndá ro che cuhno vederihquentiyon yehn.

¹⁸ Nduco tihcá, ndáhco cåde Dendiohs ley che dirun Moisés, te hua cochihve ¹⁹ cava che ndedevahn ihyán. Menun ley min ne, ndá Dihvo vo Jesucristo che tahque ndah vederihquentiyon yahn ye. Ihyán min cochahtino vo ihyán cava che tuno vo nan Dendiohs.

²⁰ Avane ne, cuahn che dechuh Dendiohs Dihvo vo Jesucristo ne, numacuahn vedeyudo cah ye ndudo yahn ye che co ye nduhcá chidocuyán ndinán. ²¹ Yahn chidocuyán chenahn chahn ne, hua tihcá cah ye ndudo yahn ye. Cuahn che ndáhco ye vederihquentiyon min tah Dihvo vo ne, cah ye ndudo yahn ye che ndirun tuhca:

Dihvo vo Dendiohs ne, numacuahn vedeyudo cah ye ndudo yahn ye, ne va che conahn.

Rahn ye ri ye Daya ye: “A tendahnún di che co chidocuyán ndinán, cuhnde tah vederihquentiyon nduhcá che quenán cuma Melquisedec,

ne hua ndá ro che cuhno vederihquentiyon yehn.”

²² Nducote a Dihvo vo Jesucristo che nuhnde tah ye vederihquentiyon min ne, conahn ndudo che chihco cåde Dendiohs cavo vo. Ndudo min ne, tahque ndah che co ley che chihnde a rahn me. ²³ Chidocuyán chahn ne, yahn ye chahtenan ye nan ntiyon, te nducote ihyán iyehense ye ne, ca rih ye ca rendacorun ye. ²⁴ Ate Dihvo vo Jesucristo ne, cuhnde tah ye vederihquentiyon min cuahn dama, te hua ndá ro che coh ye. ²⁵ Chemin che ihyán che tuno ye nan Dendiohs cava ye ne, ndedevahn ye ihyán, ne ametah conda ye, te va ye cuahn dama, rahn nan ye ihyán nan Dendiohs.

²⁶ Ama chidocuyan nduhça ihyan min che rendotenan vo. Ihyan min ne, ndah ye, ne metah nde ama nunde yahn ye. Hua dama ri ye nduco ihyan nunde. Ndeva Dendiohs yavenan ye, ndeva ye ihyan vahchetero. ²⁷ Chidocuyan ndinan chenahn chahn ne, rendotenan ye che çahn ye ite cuahn dama, co te vedino çava nunde yahn man ye man, nunde yahn ihyan man. Ate Dihvo vo Jesucristo ne, chihco mendahn ye ihyan, chih ye, ne nduco chemin ama yune no nedihve ye nunde yahn ihyan iyehnse. ²⁸ Chidocuyan ndinan chenahn chahn che chihnde tah ye ley che dirun Moisés ne, ihyan nunde ye. Ate cuahn che ndahco çade Dendiohs ley min ne, numacuahn vedeyudo ndahco ye vederihquentiyon tah Daya ye, ihyan min che hua nda ro che condihco ye nunde.

8

Nuhnde tah Dihvo vo Jesucristo vederihquentiyon ra che ndahco çade Dendiohs

¹ Dihvo vo Jesucristo ne, ndi ye nduhça ama chidocuyan che tahque ndinan, rahn nan ye uvo, va ye vahchetero lado tah çaco Dendiohs. Ndudo cuh che tahque menan vihça van nducuahn che a dirun nan çaca cuh. ² Chidocuyan che tahque ndinan che chahte ye iyehnse ne, chahtenun ye chete yaco che dendah ihyan. Ate Dihvo vo Jesucristo ne, va ye vahchetero. Min ne, ndiyu ihyan iyehnse dendah ye. ³ Chidocuyan chahn ne, chenan cuma ye ntiyon che rihco ye ndeh nan vedino nan ta. Ate Dihvo vo Jesucristo ne, chihco mendahn ye ihyan, chi ye vedino çavo vo. ⁴ Ndete che muhn iyehnse quenan Dihvo vo ne, nde hua conan ye nan ntiyon che redin chidocuyan che rihco ye vedino nan ta nduhça che rihquentiyon ley che dirun Moisés, te a ihyan chahn che nda cuande yahn ye ntiyon min. ⁵ Ihyan

chahn ne, redin ye ntiyon chete yaço che ndedendah ihyan menun vahchetero nan che va Dendiohs. Devano vo che menun, te cuahn che canan Moisés dendah ye yaço me ne, rahn Dendiohs, ri ye ihyan: “Cuihque cudadó, ne cuendendah nducuahn nduhca che nahme di tingüete me.” ⁶ Chidocuyan chahn ne, muhn iyehñse cuh che va ntiyon yahn ye. Ate Dihvo vo Jesucristo che ndi ye anduhneca chidocuyan che rahn nan ye uvo nan Dendiohs ne, tahque chahte vederihquentiyon yahn ye che co vederihquentiyon yahn ihyan chahn, te tahque ndah vederihquentiyon che ndahco cade Dendiohs che co vederihquentiyon ndico me man, tahque ndah ndudo che te ye uvo che co ndudo che cah ye ihyan ndico yuhn vo man.

⁷ Vederihquentiyon ndico me ne, hua quendah ndah, ne chemin che ndaconan ndahco cade ye. ⁸ Nducote ndihchero Dihvo vo Dendiohs che hua redinahn ihyan vederihquentiyon ndico me ne, rahn ye:

Caviyan deman ne, ndahco cade ndudo yahn nduco ihyan naci3n yahn Israel man, ihyan naci3n yahn Judá man.

⁹ Ndahco cade ndudo che cah ihyan ndico yahn ye cuahn che chinán ihyan, ndetendáh ihyan naci3n yahn Egipto.

Ihyan chahn ne, hua dinahn ye vederihquentiyon che cah ihyan, ne chemin che chacondah vedamé ihyan.

¹⁰ Nda ro yahn ne, ndahco cade ndudo yahn nduco ihyan naci3n yahn Israel.

Dín che conahn ye vederihquentiyon yahn, ne hua conan ye.

Tuhme nedin yahn ihyan, ne ndeva ye yavenán.

¹¹ Nda ro min ne, hua rendotenan che cacuahn vih ye van dihno ye man, van combiero yahn ye man, cava che tumacadino ye vederihquentiyon yahn,

te tumacadino nducoyaca ihyan, nde ihyan ndico man, nde checahya man.

¹² Nchahc6 yahn ye, ne ametah ndaconan conun in6 nunde yahn ye.

¹³ Nducote rahn Dendiohs che a ndahco cade ye vederihquentiyon yahn ye ne, a devano vo che a chuh ro yahn vederihquentiyon ndico me, a chihcoman ye.

9

¹ Ihyan ndico yuhn vo ne, chihnde tah ye vederihquentiyon ndico nan che ndihco cade Dendiohs nduhca che quenán cuma che ndeva ihyan yavenan ye. Namin chihnde tah ye ama yaco che dendah ye. ² Nan derenda chete yaco me ne, duche Nan Ta Yudo. Min va candelero man, mesa nan che retave pan che ri vedino man. ³ Mendahn chete yaco ne, quendihco ama tino chahte numa chahno. Cuahn candevah vedame tino me ne, duche Nan Ta Che Tahque Yudo. ⁴ Min va ama nan ta diyahnguan nan che riche cuhn. Namin va ama yave che ndacotuma diyahnguan. Chete ne, chenun tu rahno nan che ndirun vederihquentiyon yahn Dendiohs man, quenun ama jarro che ndinda nduco diyahnguan nan che chenun pan che duche maná man. Namin quenun nducodi che neve, che quenán cuma Aar6n. ⁵ Menan yave me ne, a min che nan ta nan che rihnde vedino cava nunde yahn ihyan. Min vatendi o ángel che ndindah ye, ne chendah reche ye. Ama quendihco yudo min, te min riya Dendiohs. Conahn nan vo muhn che rente vo yahn nan ta me. ⁶ Tihca va yan nducuaahn chete yaco me, ne chidocuyan chahn ne, renda ye cuahn dama nan ta nan derenda me, redinahn ye ntiyon che chenán cuma ye. ⁷ Ate Nan Ta che Tahque Yudo me ne, atenan chidocuyan che tahque ndinan me renda ye ama yune no che ama nduyo. Queri ama yune

che condā ye ne, va che quenda ye yun yahn ite çava che co vedino yahn nunde yahn mañ ye mañ, nunde yahn nducoyaça ihyan mañ. ⁸ Nduco chemin ne, rete Vaco Ndah yahn Dendiohs, recadino vo te numanahn che va ca vederihquentiyon ndico me ne, nduhça che quendihco tino mendahn chete yaço, ne hua co condā adecoduhno ihyan Nañ Ta Che Tahque Yudo me ne, tihça hua co tuno ihyan vahchetero. ⁹ Yahn tino che quendihco chete yaço ne, a ndero ndi che rihco vih ihyan nañ Dendiohs ro min cuahn che va ca vederihquentiyon ndico me. Nde ama nañ dehtenduh vedino che recah ihyan Dendiohs ro min ne, hua co din che cuahtemañ ino ye. ¹⁰ Vederihquentiyon min ne, chihnde çava che co devano ihyan dehtenduh che co cheh ye mañ, cuh ye mañ, taça che nano ye tañ ye mañ, dehtenduh yahn ye mañ, ne chengu nde dechuh Dendiohs Dihvo vo Jesucristo, ndahco çade ye. ¹¹ Cuahn che nda Dihvo vo ne, ndi ye nduhça ama chidocuyañ che tahque ndinañ, nda ye vederihquentiyon ra che tahque ndah. Chihno min ne, conahn ye vahchetero. Chidocuyañ che tahque ndinañ chahn che chihnde tañ ye vederihquentiyon ndico me ne, din ye ntiyon chete yaço che ihyan dendah ye. Ate Dihvo vo Jesucristo ne, vahchetero va Ye. ¹² Chidocuyañ che tahque ndinañ chahn ne, nduyo nduyo rendotenan ye yun yahn chivato mañ, itenine çahya mañ, çava che co vedino yahn nunde yahn ihyan. Ate Dihvo vo Jesucristo ne, chihco mendahn ye ihyan, ne nduco yun yahn mañ ye nedihve ye nunde yuhn vo. Ama yune no ndedevahn ye uvo, conahn ye vahchetero nañ Dendiohs. ¹³ Nañ vederihquentiyon ndico me ne, richihve yun yahn chivato mañ, itenine mañ iya yahn itenine che ndihquiañ ye ite mañ, çava che co vedino, ne cuhndemañ ino ihyan che cahnda yahn ye che condā ye chete yaço. ¹⁴ Ate nde tahque richihve yun yahn Dihvo vo

Jesucristo, ihyan min che metah nde ama nunde yahn ye. Ihyan min ne, numacuahn vederihquentiyon yahn Vaco Ndah yahn Dendiohs, chihco mendahn ye ihyan, chih ye cava che ndaco vo vederenchahco yahn nunde yuhn vo, ndevahn vo. Man ne, hua dehve rahco vo, redinahn vo vederihquentiyon yahn Dendiohs, ihyan min che va ye vahchetero.

¹⁵ Nducote chih Dihvo vo Jesucristo, chera yun yahn ye ne, va tah ye vederihquentiyon ra, rahn nan ye uvo nan Dendiohs. Chemin che ihyan che a tendahnun Dendiohs ne, cuahtenan ye vahchetero numacuahn ro nduhca che cah Dendiohs ndudo yahn ye. Nducote chih Dihvo vo ne, ndedevahn ye uvo, te cava ihyan min nchahco Dendiohs nunde yuhn vo che hua dinahn vo vederihquentiyon yahn ye che chihnde ro menan. ¹⁶ Testamento che rihco ihyan ne, ndete che nuhnde cuaco che a chih ye ne, conahn. ¹⁷ Ate ndete che va ca ye ne, hua co conahn. ¹⁸ Vederihquentiyon che rihco cade Dendiohs ne, va che cora yun cava che conahn. ¹⁹ Chemin che cuahn che chihno cahndudo Moisés vederihquentiyon che cah Dendiohs ihyan, chihnevan nducoyaca ihyan yan ne, chetah ye ama tihve yudo yahn itecuche che nekah cuah nduco ama ticua yata che duche hisopo, ne decahnnda ye nduco yun yahn itenine cahya man, yun yahn chivato man, che ndihchetahn nduco nune. Tuhme cahnan ye yun me nan libro che ndirun vederihquentiyon min man, chinun ye van nducoyaca ihyan man, ²⁰ ne rahn ye: “Nduco yun cuh, conahn vederihquentiyon yahn Dendiohs che te ye uvo.” ²¹ Namin cahnan ye yun me chete yaco man, nan dehtenduh che va min man. ²² Nan vederihquentiyon yahn Dendiohs che dirun Moisés ne, a nahn nducuahndehnduh va che co vihco nduco yun yahn ite. Namin va che coh ite, cora yun yahn te cava che nchahco Dendiohs

nunde yahn ihyan.

Chih Dihvo vo Jesucristo cava nunde yuhn vo

²³ Yaco nan che chihnde vederihquentiyon ndico min ne, chihnde menun vahchetero. Ndeucuahn dehtenduh che va chete yaco min ne, rendotenan yun yahn ite cava che co vihco. Ate cava che tuno vo vahchetero nan va Dendiohs ne, hua cochihve yun yahn ite. ²⁴ Chidocuyan ndinan chahn ne, atenan chete yaco min chihnde vederihquentiyon yahn ye. Ate tahque yudo vederihquentiyon yahn Dihvo vo Jesucristo, te vahchetero va ye, rahn van ye uvo nan Dendiohs. ²⁵ Chidocuyan chahn ne, nduyo nduyo renda ye Nan Ta Che Tahque Yudo, ne rendotenan ye yun yahn ite cava che co vedino. Ate Dihvo vo Jesucristo ne, ama yune no chih ye, chera yun yahn ye cava nunde yuhn vo. ²⁶ Nde nan canan iyehanse ne, ama yahn ite quenar cuma che chihno ihyan ndico yuhn vo, chi te vedino. Ate nda ro che ndahco cade Dendiohs vederihquentiyon yahn ye ne, nda Dihvo vo Jesucristo, chihco mendahn ye ihyan, chih ye ama yune no, cava che nchahco Dendiohs nunde yuhn vo. ²⁷ Nducoyaca ihyan iyehanse ne, a nihnde cade che va che coh ye. Adiva ne, va che techecade Dendiohs yahn ye. ²⁸ Dihvo vo Jesucristo ne, chih ye ama yune no, nedihve ye nunde yahn ama yahn ihyan. Nda ro yahn ne, ndaconan chi tun ye, ndiyu cava che coh ye tama yune cava nunde, ate cava che ndeva ye ihyan che numa ino ye chenar rino ye ihyan.

10

¹ Vederihquentiyon che ndahco cade Dendiohs ne, tahque ndah che co vederihquentiyon che chihnde tah Moisés. Nan vederihquentiyon ndico me ne, hua tuno ihyan nan Dendiohs, andahre nduyo nduyo recan ye vedino cava nunde yahn ye. ² Ndete che ndaca ihyan

chahn vederenchahco çava nunde yahn ye ama yune no ne, ametah rendotenan che ndaconan çah ye vedino. Ate hua nchahco Dendiohs nunde yahn ye ama yune no, ne chemin che hua rihndeman ino ye, redin nunde yahn ye. ³ Nduyo nduyo che recah ye vedino ne, renecahco ye che chendihco ye nunde, ⁴ te yun yahn itenine man, yun yahn chivato man ne, hua co din che ama yune no ndaca ihyan vederenchahco çava nunde yahn ye.

⁵ Chemin che cuahn che nda Dihvo vo Jesucristo iyehense ne, rahn ye ri ye Dendiohs:

Hua renan ino ne che rihno ihyan ite, ri te vedino nan ne. Tahque ndah ne ne, din ne che ndó nduhca ama ihyan iyehense, çahco mendahn u coh, nedihvé nunde yahn ihyan.

⁶ Hua renan ino ne che rihno ye ite, rihquiyahn ye ite, ri te vedino çava che nchahco ne nunde yahn ye.

⁷ Dendiohs yahn, nducote hua renan ino ne dehtenduh vedino chemin chan ne, a ndá muhn iyehense çava che dinahn che rihquentiyon ne nduhca che a ndirun yahn nan Ndudo yahn ne.

⁸ Dinoca rahn Dihvo vo Jesucristo che hua renan ino Dendiohs dehtenduh vedino che recah ihyan çava nunde yahn ye andahre nan vederihquentiyon ndico a nihnde çade che va che çah ye. ⁹ Tuhme rahn ye: “A ndá muhn iyehense çava che dinahn che rihquentiyon ne.” Nduco che tihca rahn ye ne, chihco ro ye che a nuhnde çade vederihquentiyon ndico me, te chihco mendahn ye ihyan menun vedino che recah ihyan ro menan. ¹⁰ Nan vederihquentiyon che ndahco çade Dendiohs ne, nchahco ye nunde yuhn vo yahn che chihco mendahn Dihvo vo Jesucristo ihyan, chih ye ama yune no, ndedevahn ye uvo.

¹¹ Nan vederihquentiyon ndico me ne, va che çahco chidocuyan chahn vedino ro ro, ate vedino chemin chan

ne, hua redin che ndaca ihyan vederenchahco cava nunde yahn ye ama yune no. ¹² Ate Dihvo vo Jesucristo ne, chih ye, nedihve ye nunde yuhn vo ama yune no. Chihno min ne, conahn ye vahchetero, chihnde ye lado tah cuaco Dendiohs. ¹³ Min quenan rino ye nde nda ro che ndahco ndiya Dendiohs ihyan che hua ri rendihche ye ihyan, nevahnecon ye ihyan. ¹⁴ Ihyan min ne, ama yune no ndedevahn ye ihyan yahn ye, chihco mendahn ye ihyan, chih ye cava ye. ¹⁵ Cuaco chemin, te namin din Vaco Ndah yahn Dendiohs che dirun ihyan profeta tuhca:

¹⁶ Rahn Dihvo vo Dendiohs: “Nda ro yahn ne, ndahco cade ndudo yahn nduco ihyan yahn.

Din che conahn ye vederihquentiyon yahn, ne hua conan ye.”

¹⁷ Namin rahn ye:

Nchahco yahn ye, ne ametah ndaconan conun ino nunde yahn ye.

¹⁸ Cuahn che a nchahco Dendiohs nunde yahn ihyan ne, ametah rendotenan che cah ca ye vedino.

Nahn che cochahtino vo Dendiohs

¹⁹ Dihno, nan vederihquentiyon ndico me ne, nde ama ihyan yan hua co nda ye Nan Ta Che Tahque Yudo. Ate nan vederihquentiyon ra ne, nducote a chih Dihvo vo Jesucristo, chera yun yahn ye, nedihve ye nunde yuhn vo ne, hua dehve rahco vo, co tuno vo vahchetero nan Dendiohs. ²⁰ Nan vederihquentiyon ndico me ne, quendihco tino me chete yaco cava che hua chuh ihyan, nda ye Nan Ta Che Tahque Yudo me. Ate nan vederihquentiyon ra che va tah Dihvo vo Jesucristo ne, co tuno vo vahchetero nan Dendiohs, te chihco mendahn ye ihyan, chih ye cavo vo. ²¹ Nducote ndi Dihvo vo Jesucristo nduhca ama chidocuyan che tahque ndinan, rahn nan ye uvo ihyan yahn Dendiohs ne, ²² chemin che ndahco vo chedave yuhn vo

taḥ Dendiohs. Hua dehve raḥco vo, te ritahno vo Dihvo vo Jesucristo numa ino vo. A ndaço vo vederenchahco çaḃa nunde yuhn vo. A chedenune vo, ne maḥ ne, anduhneça ndete che a ndo dave vo nduco nune dave. ²³ Quendi vo numa ino vo cochahtino vo che ndeva Dendiohs uvo, te dinahn ye ndudo yahn ye che te ye uvo. ²⁴ Nahn che necaḥ yaḥ ama taḃo vo chedave yahn viḥ çaḃa che quendi vo diḥ yahino viḥ vo maḥ, diḥ vo che ndaḥ maḥ. ²⁵ Hua caḥcomañ vo che rendo daḃo vo nduco viḥ nduhça che redin naḥn diḥno vo che riḥcomañ ye. Tahque ndaḥ ne, quendi vo nde tahque numa ino vo necaḥ yaḥ ama taḃo vo chedave yahn viḥ, te a cochi nino ro che ndaconan chi Dihvo vo Jesucristo.

²⁶ Ndete che a chenahn vo ndudo ndaḥ yahn Dendiohs, ne cuaḥcotahḥ vo ne, tuhme ametah nchahco ye yuhn vo. Ndete che cuaḥcotahḥ vo ne, metah nguahco yuhn vo che chih Dihvo vo Jesucristo. ²⁷ Hua co cuahtemaḥ ino vo, te va che cuhnde caḃe yuhn vo, co vo castigo yah vaḥ ruchiyahḥ daḃa nduco iḥyan che hua ri rendiḥche ye Dendiohs. ²⁸ Nducoyaça iḥyan che rahcotahḥ ye yahn vederihquentiyon che dirun Moisés ne, ndete che ndaḥco cuaço o ino iḥyan nunde yahn ye ne, va che caḥno iḥyan yaḥ iḥyan, ametah vederenchahco çaḃa ye. ²⁹ Iḥyan che a chenahn ye Ndudo yahn Dendiohs ne, ndete che cuacondah vedame ye Daya Dendiohs maḥ, ndete che duche rino ye vederihquentiyon yahn Dendiohs che chih Daya ye, chera yun yahn ye çaḃa che ndedevahn ye iḥyan iyehḥse maḥ, ndete che cuaḥcotahḥ ye yahn Vaco Ndaḥ yahn Dendiohs, iḥyan min che yahino ye iḥyan maḥ ne, tuhme tahque chahte castigo va che co ye che co iḥyan chahn. ³⁰ Iḥyan che tiḥça redin ye ne, hua co ndevahn ye, te raḥn Dendiohs: “U diḥ castigo iḥyan nunde, ndaḥco menún yahn ye.” Namin raḥn ye: “Iḥyan yaḥn ne, u che

Dihve ye. U techecadé yahn ye.” ³¹ ;Ama cahnda yuhn vo che cuahtendihco vo nunde nan Dendiohs, ihyan min che va ye vahchetero!

³² Cuenecahco nchuhn cuahn che cade chihnevan ne ndudo ndah yahn Dihvo vo Jesucristo, chitahno ne ihyan. Ama quendaḥ ne vedeçahntino che ama din tan ihyan nduco ne. ³³ Nahñ cuan ne, din duche yahn ye nchuhn, chahn ye nchuhn nan nducoyaca ihyan. Nahñ cuan ne, ama chi ran ne che chahn ihyan combiero yahn ne che nduco ne man, ³⁴ din ne vedevahino nduco combiero yahn ne che chahtenun ye vacoyahn man. Din chahtino ne, nde hua chi ran ne yahn che chehnevinan ihyan dehtenduh yahn ne, te a devano ne che nuhnde menun yahn ne vahchetero dehtenduh che nde tahque ndah, che ngu cuahn dama. ³⁵ Chemin che nahn che quendi ne coçahntino ne. A devano ne che ndahco menun ndahva Dendiohs yahn ne. ³⁶ Nahn che cuahtenan cuma ne vedeçahntino çava che dinahn ne vederihquentiyon yahn ye, ne ndeva ye nchuhn nduhça che te ye ndudo yahn ye. ³⁷ Nan Ndudo yahn ye ne, a ndirun tuhça:

A nun cuahn nda ihyan min che a va çade che chi ye.
Ametah condah ye.

³⁸ Ihyan che ritahno ye u ne, nedin yahn ihyan.

Va che quendi ye coçahntino ye u, te ndete che çahcoman ye u ne, cuacondah vedame ihyan.

³⁹ Uvo ne, ritahno vo Dendiohs, ne chemin che ndiçahntino vo che ndeva ye uvo. Hua dama co vo nduco ihyan che racondah vedame ye Dendiohs, ne rinda ye.

11

Nduhcq che ritahno ihyan Dendiohs

¹ Che ritahno vo che ndeva Dendiohs uvo ne, chenan ino vo che va che conahn. Andahre condah conahn, ate nducote ritahno vo ihyan ne, a devano vo te va che conahn. ² Tihca, te ihyan ndico yuhn vo ne, nedin yahn Dendiohs ihyan yahn che chitahno ye ihyan.

³ Nducote ritahno vo Dendiohs ne, a devano vo te man ye dendah ye iyehense. Andahre metah dehva ro menan, ate chihquentiyon no ye, ne chihnde ro.

⁴ Abel ne, chitahno se Dendiohs, ne chemin che cah se ihyan ama vedino che tahque ndah che co che cah Cain. Nducote chitahno se ihyan ne, nedin yahn ye sahn, nevahnecun ye vedino yahn se. Sahn min ne, a ndih se, ate nducote chitahno se Dendiohs ne, nde meniyon retihyon yune se uvo che cotahno vo Dendiohs nduhca che chitahno se.

⁵ Enoc ne, chitahno ye Dendiohs, ne chemin che ndeva ye ihyan vahchetero dequenduche ye. Ametah ndaca ndihchero ihyan iyehense ihyan. Nan Ndudo yahn Dendiohs ne, a ndirun yahn Enoc, che cuahn che quenah ye iyehense ne, ndahca quenah ye nan Dendiohs, ne nedin yahn Dendiohs ihyan. ⁶ Cava che tuno vo nan Dendiohs ne, va che cotahno vo ihyan, te ihyan che ritahno ye che va ye man, che rah ye ihyan man ne, atenan ihyan chahn che rendeva ye ihyan.

⁷ Noe ne, chitahno ye Dendiohs, ne chemin che dinahn ye, dendah ye arca me cuahn che cahh Dendiohs chi ye ihyan che va che ndedetoh ye iyehense. Chete arca me quenun ye nduco ihyan yahn ye, ndevahn ye. Nducote chitahno ye ndudo min yahn dehtenduh che comah cochi che co ne, chihco ro ye che ihyan nunde ne, a ndinda ye yahn che hua chitahno ye. Namin nducote chitahno ye ne, nedin yahn Dendiohs ihyan.

⁸ Abraham ne, nducote chitahno ye Dendiohs ne, dinahn ye cuahn che yahve ye ihyan che cahñ ye yahñ yahn ñan che cah ye ihyan. Andahre nde hua devano ye ti quenda Dendiohs ihyan, ate chihcomañ ye ñan vāco ye, cuahn ye. ⁹ Nducote chitahno ye Dendiohs ne, quenān ye yahñ min, andahre tāmā naciōn. Quenun ye vah tino nduhcā ihyan chenun ye yune. Tihcā quendi Isaac mān, Jacobo mān, che namin nduco ye cahñ Dendiohs ndudo yahñ ye ihyan. ¹⁰ Tihcā din Abraham, te quenān rino ye che ndeva Dendiohs ihyan vahchetero, ñan che āma ndahcā, ñan che mān Dendiohs dendah ye.

¹¹ Namin ihyan ndāhta yahñ ye Sara ne, chitahno ye Dendiohs, ne andahre indihte cuahn ye, ate chichahtino ye che conahn ndudo yahñ Dendiohs, ne chemin che ndāca āma dāya ye nduhcā che cahñ Dendiohs ndudo yahñ ye ihyan. ¹² Min quendinan che āma chi yahñ ndāta yahñ Abraham, andahre a indihte cuahn ye ro min. Nduhcā che ndeh iyon che chenān ñan ro mān, nduhcā che ndeh yahñdute che chetāve chihto nuniyahñ mān, che nde hua cocha vo din ducho vo ne, tihcā āma chi yahñ ndāta yahñ ye.

¹³ Nducoyāca ihyan ndico chahn ne, chih ye. Numanahn che chahtenan ca ye iyehñse ne, hua chenān chinahn nduco ye nducuahn dehtenduh che cahñ Dendiohs ndudo yahñ ye ihyan. Ate chichahtino ye che va che conahn nducuahn, ne chi yeno ye, te a devano ye te ndiyu iyehñse cuh va che cuahtenan ye cuahn dāma. Redin ye cuande che anduhñecā ihyan chenun yune ye, te a devano ye che neve ro no cuahtenan ye iyehñse, tuhme ndeva Dendiohs ihyan. ¹⁴ Nducote redin ye cuande che anduhñecā ihyan chenun yune ye ne, rihco ro ye che chenān ino ye che cuahtenan ye vahchetero. ¹⁵ Ndete che ndedecadino ye yahñ ñan vāco ye che chihcomañ ye ne, a

ndaconan ca ye. ¹⁶ Ate hua tihca din ye, te tahque ndah ye ne, chahtenan ino ye che nda ye vahchetero. Chemin che nedin yahn Dendiohs ihyan numa ino ye, ne chihco yan ye vahchetero cava ye.

¹⁷⁻¹⁸ Cuahn che ndihchenan Dendiohs Abraham ne, nducote chitahno Abraham ihyan ne, dinahn ye yahn ye, ne quenda ye daya ye Isaac cava che cahno ye sahn, co se vedino nduhca che chihquentiyon ye. Ama ndiyahn ra sahn min yahn ye, ate a chihquino ye che cahno ye sahn, andahre a necah Dendiohs ndudo yahn ye ihyan che a sahn min cahco ndata se ndata yahn ye. ¹⁹ A devano ye te Dendiohs ne, nde tenahn ri rendedetuhche ye. Che lado yahn Abraham ne, anduhneca ndete che ntuche se van tenahn, te a va che coh se che rahco ye.

²⁰ Isaac ne, chitahno ye Dendiohs, ne chemin che chica ye ihyan che conan ye daya ye Jacob man, Esaú man, din ye che ndahca cuahtenan se. ²¹ Jacob ne, chitahno ye Dendiohs, ne chemin che cuahn che a nda nino ro che coh ye ne, chica ye ihyan che conan ye queri ama daya José, din ye che ndahca cuahtenan se. Chihno min ne, quendih ndudo ye indahco yahn ye, ndeva ye yavenan Dendiohs. ²² José ne, chitahno ye Dendiohs, ne chemin che, cuahn che nda nino ro che coh ye ne, rahn ye ri ye ihyan nación yahn ye Israel, che adiva ne, va che ndaca ye nación yahn Egipto. Namin chihquentiyon ye ihyan chahn che nda ro min ne, ndiquenda ye ine yahn ye.

²³ Indihthe yahn Moisés ne, chitahno ye Dendiohs, ne chemin che cuahn che chihndeyan Moisés ne, tihyon ndeh ye sahn ino iyo. Chichahtino ye Dendiohs che ndedevahn ye sahn cava che hua cahno sandado sahn nduhca che ndihquentiyon rey yahn Egipto, te ndihchero ye che ama ndahca se. ²⁴ Moisés ne, chitahno ye Dendiohs, ne chemin che cuahn che a chi mahn ihyan ye

ne, tehche ino ye tahn daya rey me che din daya te ihyan. ²⁵ Ndotenan che quendi ye vedeyeno yahn man ye numanahn che quenan ye iyehense, condihco ye nunde ne, quenan ino ye, ndo nduco ye ihyan yahn Dendiohs, chuhrihn ye nduco vih. ²⁶ Tahque ndah ye ne, chihcoman ye nducuahñ vedecuihca che va naci3n yahn Egipto, ne numacuahn vedeyeno chuhrihn ye, din tan ihyan nduco ye nduhca che din tan ihyan nduco Dihvo vo Jesucristo. Tihca din ye, te chichahtino ye Dendiohs che ndahco menun ye yahn ye. ²⁷ Nducote chitahno ye Dendiohs ne, andahre ama tan rey me, ate nde hua din vah ye ihyan, chica ye naci3n yahn Egipto. Tihca din ye, te din chahtino ye Dendiohs, ihyan min che va ye vahchetero.

²⁸ Nducote chitahno ye Dendiohs ne, din ye vihco ro yudo, ne chihquentiyon ye ihyan naci3n yahn Israel che cahnan ye yun yahn itecuche cahya nan yahn yahn chendevah vaco ye, cava che, cuahn che dechuh Dendiohs 3ngel me ne, ndihchero ye, ne hua cahno ye daya ye che menan. ²⁹ Ihyan naci3n yahn Israel ne, chitahno ye Dendiohs, ne chemin che chi chuh ye mendahn Nuniyahn Cuah anduhneca che chuh ye nan yahn cuma. Ate cuahn che chuh sandado yahn Egipto che ndah se ihyan chahn ne, chendih nune sahn, chanorine se.

³⁰ Adiva ne, nducote chitahno ihyan chahn Dendiohs ne, chihno ndache ro che chacondutonan ye chete yahn yan Jeric3 ne, ndora. ³¹ Rahab, ama ndahna che ndere quechica te ro menan ne, chitahno te Dendiohs, ne nevahneacun te sandado yahn naci3n yahn Israel che vatechica se rendihchero ndudo se. Chemin che ndevahn te, hua chih te dama nduco ihyan che chahcotahn ye yahn Dendiohs.

³² Ama yahn ca ihyan che chitahno ye Dendiohs, co nte vo yahn ye. Ate cava che hua nduh condah yuhn vo ne,

atenan tama te o ye ntiyon yán ihyan, nduhca Gedeón man, Barac man, Sansón man, Jefté man, David man, Samuel man, ihyan profeta chenahn man. ³³ Ihyan chahn ne, nducote chitahno ye Dendiohs ne, nahñ ye ne, ndahco ndiya ye ndeh nación. Nahñ ye ne, ndahca chihquentiyon ye. Nahñ ye ne, chinan Dendiohs ihyan nduhca che cah ye ndudo yahn ye ihyan. Nahñ ye ne, cuahn che tahn nun ye león ne, ndedevahn Dendiohs ihyan, hua cheh te ihyan. ³⁴ Nahñ ye ne, ndedevahn Dendiohs ihyan van ruchiyahn, ne hua chiche ye. Nahñ ye ne, ndedevahn Dendiohs ihyan tin espada, ne hua dehva chi yahn ye. Nahñ ye ne, andahre hua dito ye, cah dito Dendiohs ihyan. Nahñ ye ne, chinan Dendiohs ihyan van canda, ne ndahco ndiya ye sahn che ruhn se nduco ye. ³⁵ Namin nahñ ihyan ndahta, ndedetuhche Dendiohs tenahn yahn ye.

Nahñ ye, andahre cah rihn sahn nunde ihyan, chihno se ihyan, ate hua chacondah vedame ye Dendiohs, te chenan ino ye che ndeva ye ihyan, cuahtenan ye vahchetero. ³⁶ Nahñ ye ne, din duche yahn se ihyan man, chahn se ihyan man, chiquiyahto se cadena ihyan man, chih se ihyan vacoyahn man. ³⁷ Nahñ ye ne, chihno se ihyan nduco tu. Nahñ ye ne, chihca man se ihyan. Nahñ ye ne, tumarande se ihyan. Nahñ ye ne, chihno se ihyan nduco espada. Nahñ ye ne, chahtechica muhn chahtechica min ye, atenan dima itecuche man, chivato man, chahtenun ye. Chahtechica ye vedevah vedecheh, din tan ihyan nduco ye. ³⁸ Rahtenan muhn rahtenan min ye, yahn nan che metah duhva man, van icoyahn man, iveyava man, dutiyahn man. Nducoyaca ihyan chahn ne, che cava ihyan nunde ne, nde hua redin yahn che tihca chuhrihn ye, chahtechica ye. ³⁹ Nducoyaca ihyan chahn ne, andahre nedin yahn Dendiohs ihyan yahn che chitahno ye ihyan, ate metah conan conahn nduco ye nducuahn che necah ye

ndudo yahn ye ihyan, ⁴⁰ te a ndihco çade ye che cuahtenan rino ihyan chahn nde nda ro che dama ndeva ye uvo nduco ye vahchetero.

12

Cohahtino vo Dihvo vo Jesucristo

¹ Nducote ama yahn ihyan chahn chitahno ye Dendiohs, chihco ro ye van vo nduhca che chitahno ye ne, chemin che nahn che nuhn ino vo, cahcoman vo che rahtechico vo vedeyeno yahn man vo, rahtendihco vo nunde, ne nduhca sahn che numa ino se rano se çade, nde nan che quendahn se, tuno se nan yahn çade ne, tihca quendi vo numacuahn vedehtino, dinahn vo che nahn Dendiohs.

² Nahn che cohahtino vo Dihvo vo Jesucristo, ihyan min che tihyon yune ye uvo che chitahno vo Dendiohs man, din ye che tuno vo nan ye man. Ihyan min ne, chihco mendahn ye ihyan, quenah yah ye nan cruz. Hua tumacah ye andahre ama chuhrihn ye, ne numacuahn vedecuihno chih ye, te a devano ye te cuihno min ne, ama co yeno ye. Man ne, va ye vahchetero, lado tah cuaco Dendiohs.

³ Condedecadino nchuhn nduhca che ama chuhrihn Dihvo vo Jesucristo, din tan ihyan nunde nduco ye çava che quendi ne yune yahn ye, ne hua co doh ino ne man, çava che hua cahcoman ne man. ⁴ Dehve rahco ne, andahre ama rechuhrihn ne, redin tan ihyan nunde nduco ne, ate vate ca dihno vo che nde tahque rechuhrihn ye, nde rihno ihyan nunde ihyan. ⁵ A devano ne nduhca che rahn Dendiohs, ndirun nan Ndudo yahn ye tuhca:

Dayá, u che Dihve nchuhn, redín castigo nchuhn çava che ndah yahn ne.

Cuenevahnecun ne. Hua co ndache ne.

⁶ A devano ne te ihyan che a nedin dayá ihyan, che yahinó ihyan ne, a ihyan chahn che redin castigo ihyan çava che ndah yahn ye.

⁷ Codin chahtino ne yahn che redin Dendiohs castigo nchuhn, te rendihche ye nchuhn nduhça daya ye, ne a çava che ndah yahn ne che tihça redin ye. A devano vo te nducoyaca ihyan redin ye castigo daya ye çava che ndah yahn. ⁸ Ihyan che hua redin Dendiohs castigo ihyan nduhça che redin ye castigo nducoyaca daya ye çava che ndah yahn ne, ihyan chahn che hua redin yahn ye ihyan. ⁹ Cuahn che tave indihthe yuhn vo uvo ne, din ye castigo uvo çava che ndah yuhn vo. Nducote nevahnecon vo ihyan ne, nde tahque redin yahn che nevahnecon vo Chido vo che va ye vahchetero, che redin ye castigo uvo çava che ndahça cuahtenan vo. ¹⁰ Cuahn che cheçahya uvo ne, din indihthe yuhn vo castigo uvo çava che ndah yuhn vo anduhneva che tuno vederendedecadino yahn ye. Ate tahque ndah ro yuhn vo che redin Dendiohs castigo uvo, te nahn ye che ndah ihyan co vo nduhça che ndah man ye. ¹¹ Cuahn che redin Dendiohs castigo uvo ne, hua renan ino vo, te ama rechuhrihn vo. Ate cuahn che tuma cuahn vo castigo yahn ye ne, ama cochihve yuhn vo çava che runecade cuahtechico vo, cuahte dihn chedave yuhn vo.

Ama çahnda che cuahcotahn vo yahn Ndudo yahn Dendiohs

¹² Nducote ama richihve castigo che redin Dendiohs uvo ne, chemin che cueneçah yan nchuhn chedave yahn ne, hua co ran ne. ¹³ Codin ne cuande, ne numa ino ne runecade cuahtechica ne çava che cua cuande ihyan che ndache ino ye, ne necah yan ye chedave yahn ye, quendi ye yune yahn ne.

¹⁴ Codin nchuhn cuande, ne runecade cuahtechica ne, hua cuahte çanda ne nduco ihyan. Tihça, te ihyan che

hua runecade ye ne, hua tuno ye nan Dihvo vo Dendiohs. ¹⁵ Nducoyaca nchuhn ne, cuihco ne cudado cava che quendi Dendiohs din yahino ye nchuhn. Hua ndihche tan ne vih, detohnan ne chedave yahn man ne man, ihyan chenahn man. ¹⁶ Hua cuahtenan nde ama nchuhn nduco ihyan che hua nihnevaco nduco ne. Nde hua tehche tah ne che ndah yahn ne, nduhca che din Esaú, che nduco tahsihn comida chahcorun se ndudo ndah che va che cahco chida se cava se yahn che sahn menan se. ¹⁷ A devano ne te cuahn che nda ro che cahco chida se ndudo ndah cava se ne, hua ndaca se andahre ama chaco se, te a ntihcue se.

¹⁸ Ihyan ndico yuhn vo ne, ndere chuhrihn ye, chahn ye tingüete me, quenan ye canedihya. Min ne, ama chiche man, ama chi man man, ama chi yudo man. ¹⁹ Chihnevan ye che tive corneta man, che nte Dendiohs nduco ye man, ne nducote ama yudo ndudo yahn ye ne, chica ye favor ihyan che metah quendi ye cahma ye. ²⁰ Dihya ihyan chahn chi yahn che ama chihco yudo Dendiohs tingüete me, te chihquentiyon ye che andahre ama ite che chahn nda te min ne, va che cahno ihyan ite nduco tu, o nduco lanza. ²¹ Ama yudo chi min, che nde man Moisés ne, ama dihya ye chi, nde tuno rendoh ye che vah ye.

²² Ate uvo ne, tahque ndah ro yuhn vo, te ndotenan che cuhn vo tingüete me ne, tuno vo vahchetero nan va Dendiohs, ihyan min che ama yudo vederihquentiyon yahn ye. Min chenan cade mil ángel, rendeva ye yavenan ye numacuahn vedeyeno. ²³ Uvo ne, a ndi cuande vo vahchetero, ne va che ndo damo vo nduco nducoyaca ihyan yahn Dendiohs che vate ye min. Uvo ne, ndichahtino vo Dendiohs, ihyan min che techecade ye yahn nducoyaca ihyan nunde. ²⁴ Namin ndichahtino vo Dihvo vo Jesucristo, ihyan min che a va tah ye vederi-

hquentiyon ra, rahn nan ye uvo nan Dendiohs. Ihyan min ne, chihco mendahn ye ihyan, chera yun yahn ye cava che nchahco Dendiohs nunde yuhn vo. A devano vo te namin chera yun yahn Abel, ate hua chichihve cava nde ama ihyan.

²⁵ Cuihco nchuhn cudado, ne hua cuahcotahn ne yahn Dendiohs, ihyan min che va ye vahchetero, che riyahve ye nchuhn. Nducote hua ndevahn ihyan ndico yuhn vo che chahcotahn ye yahn ye ro che yahve ye ihyan tingüete me ne, tahque uvo ne, hua ndevahn vo ndete che cuacondah vedamo vo ihyan. ²⁶ Ro min che yahve ye ihyan chahn ne, nde yahn nuhn. Tahque man ne, nde tahque yudo, te rahn ye: “Tama yune ne, ndiyu deman yahn din che nuhn, te namin nde nducuahn che chenan nan ro din che nuhn.” ²⁷ Nducote rahn ye che “tama yune” ne, a devano vo te ndedetoh ye nducuahn dehtenduh che va che cuihno, ne nuhnde deman dehtenduh che a nihnde cade che hua cuihno. ²⁸ Chemin che necah vo nundihve cuahn Dendiohs, te vederihquentiyon che te ye uvo ne, hua nda ro che cuihno. Ndeva vo yavenan ye numacuahn chedave yuhn vo nduhca che renan ino ye. ²⁹ Tihca, te Dendiohs yuhn vo ne, ama yudo vederihquentiyon yahn ye nduhca yahn che redin che rendo iya dehtenduh.

13

Nduhca che nahn Dendiohs che cuahtechico vo

- ¹ Cuiquendi nchuhn din yahino ne ama tama ne vih.
- ² Cuenevahnecon ne ihyan chenun yune che nda ye ndevaco ne, te van ihyan che renevahnecon ye ihyan chenun yune ndevaco ye ne, chahte ihyan che nevahnecon ye nde angel andahre nde hua tumacardino ye.
- ³ Conan vahino ne ihyan che chenun ye vacoyahn anduhneca ndete che man ne chenun ne vacoyahn. Conan

vahino ne ihyan che rechuhrihn ye, redin t̄an ihyan nduco ye, te namin nchuhn ne, iyehnse vate ne.

⁴ Nducoyaca nchuhn che nihnevaco ne ne, hua ndere cuahtechica ne nduco ihyan che hua nihnevaco nduco ne, te Dendiohs ne, din ye castigo nducoyaca ihyan che ndere rahtechica ye nduco ihyan che hua nihnevaco nduco ye man, nducoyaca ihyan che redin duche yahn ye che a nihnevaco ye man.

⁵ Hua cuahcoran nchuhn cava tume. Cuahtenan ne vedeyeno nduco che a va yahn ne, te rahn Dendiohs: “Hua cahcoman nchuhn, nde hua cuacondah vedame nchuhn.”

⁶ Chemin che nahn che cochahtino vo ihyan nduhca che chichahtino ihyan ndico yuhn vo che dirun ye tuhca:

Dihvé Dendiohs ne, a ihyan min che rinan ye u.

Chemin che hua dehve rahco, andahre din t̄an ihyan nducó.

⁷ Condihe ne ihyan ndinan yahn ne che cahndudo ye Ndudo yahn Dendiohs, chihnevan ne. Cuihco nchuhn cudado nduhca che vatechica ye, ne cuiquendi ne yune yahn ye, cuitahno ne Dihvo vo Jesucristo nduhca che ritahno ye.

⁸ Dihvo vo Jesucristo ne, ama no vederihquentiyon yahn ye. Numacuahn ro, nde nan che canan, nde meniyon, nde ro che cochi ne, hua ndacorun. ⁹ Hua quendi nchuhn dehtenduh costumbre che ricuahn ihyan. Tahque ndah che cochahtino ne Dendiohs, ihyan min che yahino ye nchuhn, che co che quendi ne ama ndeh nan costumbre nan dehtenduh che reh ne, te costumbre chemin chan ne, hua richihve nde cava man ihyan che riquendi ye. ¹⁰ Nan vederihquentiyon ndico me ne, rihco chidocuyan chahn vedino nan ta, ne nan ntiyon min riquendah che reh ye. Ate man che ndahco cade Dendiohs vederihquentiyon min ne, tahque ndah ro yuhn vo che co

ihyan chahn, te Dihvo vo Jesucristo ne, chi ye nduhc̄a ama vedino n̄an Dendiohs, chih ye c̄ava nunde yuhn vo. ¹¹ N̄an vederihquentiyon ndico me ne, renda chidocuyan che tahque ndin̄an N̄an Ta che Tahque Yudo, nda ye yun yahn ite che ri vedino c̄ava che nchahco Dendiohs nunde yahn ihyan. Me yute yahn te ne, riquiyahn ye ama lado, cuahn chihto yan. ¹² Namin Dihvo vo Jesucristo ne, cuahn chihto yan nahn yah sandado ihyan, chih ye. Min chera yun yahn ye c̄ava che nchahco Dendiohs nunde yuhn vo, nedin yahn ye uvo. ¹³ Chemin che cochahtino vo Dihvo vo Jesucristo, quendi vo yune yahn ye, andahre ndahchenan ihyan uvo, nduhc̄a che chahno man ye. ¹⁴ A devano vo te ndiyu muhn iyehnse cuahtenan vo cuahn dama, te chenani ino vo che ndeva Dendioh uvo, cuahtenan vo vahchetero numacuahn ro. ¹⁵ Nducote tihc̄a ne, cochahtino vo Dihvo vo Jesucristo, ndeva vo yaven̄an Dendiohs cuahn dama, cahnevan ihyan chenh̄an. Chemin ne, anduhneca ama vedino che cah vo Dendiohs. ¹⁶ Codin nchuhn che ndah man, codin ne vedevahino nduco ihyan che va vederetahn yahn ye man, te chemin che renan ino Dendiohs.

¹⁷ Cuenevahnecon nchuhn ihyan ndin̄an yahn yaco, codinahn ne yahn ye, te ihyan chahn che nda cuande ye nchuhn, ne va che necah cuande ye Dendiohs c̄ava ne. Runecade cuahtenan nchuhn c̄ava che hua cuih ne vederan ihyan chahn, ne co yeno ye c̄ava ne, te ndete che hua runecade cuahtenan ne ne, nde hua cochihve che redin ne.

¹⁸ Covah nchuhn c̄ava nuhn. A devano nuhn te runecade vatechica nuhn, ne nahn quendi nuhn din nuhn che ndah. ¹⁹ Nde tahque nahn che covah nchuhn c̄ava che cuahnecon Dendiohs che hua condah ndaconan chí quendihcheró nchuhn.

²⁰ A Dendiohs che redin ye che rahte dihn chedave yuhn vo man, che ndedetuhche ye Dihvo vo Jesucristo

man, ihyān min che ndah redin ye cudado uvo nduhca che redin ihyān cudado itecuche yahn ye. Dihvo vo ne, chihco mendahn ye ihyān, chih ye, chera yun yahn ye, din ye che chinahn vederihquentiyon ra che hua nda ro che cuihno. ²¹ Chemin che din Dendiohs che cuahtenan cuma nchuhn vederihquentiyon yahn Dihvo vo Jesucristo cava che runecade cuahtenan ne, din ne che ndah nduhca che nahn ye. Ndeva vo yavenan Dihvo vo cuahn dama. Tihca co.

²² Dihno, dirun tah yahn ne, ne ricā nchuhn che din chahtino ne che riyahvé nchuhn. ²³ Reté, checadino nchuhn te dihno vo Timoteo ne, a ndiquendah se vacoyahn. Ndete che nda nun se muhn ne, quenda sahn cuahn che chí quendihcheró nchuhn. ²⁴ Cuenechah ne Dendiohs nducoyaca ihyān ndinan yahn yaco man, nducoyaca dihno vo chenahn man. Cuendeva ne Dendiohs yahn dihno vo che vate ye nación yahn Italia.

²⁵ Dendiohs din yahino ye nducoyaca nchuhn. Tihca co.

El Nuevo Testamento: Cuicateco de Teutila **New Testament in Cuicatec, Teutila (MX:cut:Cuicatec, Teutila)**

copyright © 1972 Wycliffe Bible Translators, Inc.

Language: Cuicatec, Teutila

Translation by: Wycliffe Bible Translators, Inc.

Cuicateco, Teutila [cut], Mexico

Copyright Information

© 1972, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Teutila

© 1972, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22
